


ԳՐԱԽՕՍՈՒԹԻՒՆ

Claude Mutafian, Jérusalem et les Arméniens, Jusqu'à la conquête ottomane (1516),
Paris: Les Belles Lettres, 2022, 518 pp.



Քլոդ-Արմէն Մութաֆեանի «Երուսաղէմը եւ Հայերը՝ մինչեւ օսմանեան տիրապետութիւն (1516)» հերթական աշխատութիւնն ամբողջութեամբ նուիրուած է սաղիմահայոց պատմութեանն ու մշակոյթին, Սուրբ Երկրում Հայերի ներկայութեան պատմական հիմքերին, առաջին վկայութիւններին, Երուսաղէմում Հայկական համայնքի ձեւաւորման հանգամանքներին, Հայկական թաղամասի, եկեղեցիներին ու մատուռների շինութեանն ու տարբեր տիրապետութիւնների ընթացքում Հայերի Սուրբ քաղաքում գտնուելու պայմաններին: Այս գործը մենագրութիւն չէ բառի բուն իմաստով, ուր աշխատութեան հիմքում տեքստն է: Այստեղ աշխատութեան հիմքում դրուած է պատկերը (գրչագիր,

մանրանկար, գծագիր, յատակագիծ, քարտէզ, աղիւսակ, կոթողային յուշարձան, եւն), որին ուղեկցում է բացատրութիւնն ու նկարագրութիւնը՝ այսինքն պատումն ու պատմութիւնը: Եթէ փորձենք ճշգրիտ բնութագրել, ապա իրականում գործ ունենք Սուրբ Երկրում Հայոց վերաբերեալ գիթելիքն ամփոփող, խիստ գիտական հիմքով տասնամեակներով հաւաքուած, շտեմաւորուած եւ ժամանակագրօրէն ներկայացուած Պատկերագրի հետ:

Նշենք, որ Հայերի կողմից քրիստոնէութեան ընդունման ժամանակներից սկսած Սուրբ քաղաքը եղել է մեր Հայրենակիցների ուշադրութեան կենտրոնում եւ մշտապէս գրաւել նրանց դէպի իրեն, որի ապացոյցն էլ Դ.-ԺԱ. դարերում կառուցուած Հայկական բազմաթիւ եկեղեցիներն ու մատուռներն են, հնագոյն արձանագրութիւնները, Հայ եւ օտար ճանապարհորդների, ուխտաւորների ու հոգեւորականների վկայութիւններն են: Արաբական, պարսկական, լատին տիրապետութիւնների ընթացքում Հայկական համայնքը վտանգ չներկայացնելով՝ մշտապէս համեմատաբար ապահով վիճակում է եղել:

Ա. Մութաֆեանը նշում է, որ արդէն ԺԱ. դարից սկսած, Մեծ Հայքի վերջին թագաւորութեան անկումից յետոյ, թիւրքական յարձակումների արդիւնքում Հայոց գաղթականական մեծ հոսանքներ ուղղուեցին դէպի միջերկրծովեան երկրամասեր: Իսկ խաչակրաց արշաւանքների հետեւանքով լեւանտեան չորս լատին պետութիւններ հիմնուեցին, որոնց թուում Երուսաղէմի թագաւորութիւնը: Եփրատի հովտում եւ

Կիլիկիայում՝ այն է խաչակրաց արշա-
լանքների ճանապարհներին իրենց կարե-
ւոր ներկայութեան շնորհիւ հայերը ԺԲ.
դարի ամբողջ ընթացքում կարողացան
ֆրանկների հետ յարաբերութիւնների
շնորհիւ մեծ ազդեցութիւն ձեռք բերել լա-
տին պետութիւնների վրայ այդ երկրամա-
սում որպէս «Լեւանտեան Հայաստան»:

Սրբոց Յակոբեանց վանական համա-
լիրի եւ Սուրբ քաղաք այցելող ուխտաւոր-
ների համար ֆրանկների տիրապետու-
թեան ԺԲ. դարը կարելի է ոսկեդար համա-
րել: Հեղինակն իր մենագրութեան էջերում
մի ողջ գլուխ է յատկացրել այս շրջանում
Երուսաղէմում հայերի գործունէութեանը,
ինչպէս նաեւ Ս. Գերեզմանում նրանց կա-
լուածքներին:

Սալահեդդինի կողմից 1187 թ. Երու-
սաղէմի գրաւումը շրջադարձային իրա-
դարձութիւն համարելով, Ա. Մութաֆեա-
նը վստահ է, որ դա պատճառ եղաւ ԺԲ. դա-
րավերջին նոր քրիստոնեայ պետութիւննե-
րի՝ «առանց Երուսաղէմի Երուսաղէմի թա-
գաւորութեան»՝ Ա. ք. քայ մայրաքաղաքով,
Կիպրոսի Լուսինեանների եւ Հայոց Կիլի-
կեան թագաւորութիւնների առաջացմանը:

Քաղաքական այլ իրադրութեան մէջ է
յայտնւում տարածաշրջանը ԺԳ. դարի կէ-
սերին, երբ ասպարէզ իջան մոնղոլներն ու
մամլուքները:

Ա. Մութաֆեանը նկատում է, որ այս
տիրապետութիւնների շրջանում էլ չգաղա-
րեցին զանազան ճանապարհորդների այցե-
լութիւնները Ս. Երկիր, որոնք անգնահա-
տելի տեղեկատուութիւն եւ վկայութիւններ
են թողել ժամանակի Երուսաղէմի հայոց
մասին մինչեւ իր ուսումնասիրութեան վե-
րին շեմը հանդիսացող օսմանեան տիրա-
պետութեան շրջանը:

Ա. Մութաֆեանը առանձին պարբե-
րութեամբ անդրադառնում է սոյն գրքի
ստեղծման նախապայմաններին: Իր առա-
ջին իսկ այցելութեան ընթացքում (1969 թ.)

նա չափազանց ափսոսանքով է նկատել, որ
նման հսկայական ձեռագրական, նիւթա-
կան, դրամագիտական, փաստաթղթային
(դիւանային) հարուստ շտեմարան ունեցող
Երուսաղէմի պատրիարքարանի թանգարա-
նը, որը գտնւում էր նախկին հայկական որ-
բանոցի շէնքում ներկայացուած էր չափա-
զանց աղքատիկ ցուցադրութեամբ: Աւելին,
ի վերջոյ, այն դադարել էր գործել 1998
թուականից:

Վերջին տարիներին որոշում կայա-
ցուեց վերանորոգման աշխատանքներից
յետոյ վերաբացել թանգարանը: Այս նպա-
տակով հեղինակը, ինչպէս նաեւ այլ մաս-
նագէտներ էին հրաւիրուել Երուսաղէմ՝
թանգարանային ցուցադրութեան պլանն
ստեղծելու եւ այն կեանքի կոչելու համար:

Թանգարանային նմոյշների ուսում-
նասիրութեան ընթացքում Ա. Մութաֆեա-
նը յանգում է այն եզրակացութեան, որ
նոյնիսկ ցուցադրութեան հանգամանալից
կատալոգը չէր կարող արտայայտել Երու-
սաղէմի հայկական ներկայութեան հարիւ-
րամեակների պատմա-մշակութային, քա-
ղաքական ու տնտեսական ողջ պատկերն ու
հմայքը: Ուստի հեղինակը նախաձեռնում է
սոյն հատորը՝ անկախ թանգարանային
ցուցադրութիւնից եւ կատալոգից, առանց
սահմանափակման, անդրադառնալու հա-
մար հայութեան համար կարեւորագոյն
այս համայնքին՝ խորացուած ու մանրակր-
կիտ ուսումնասիրութեամբ անդրադարձ
կատարելով այն բազմաթիւ յարաբերու-
թիւններին, որ շուրջ 15 դարերի ընթաց-
քում ունեցել է Երուսաղէմի հայութիւնը
Պաղեստինի եւ յարակից այլ երկրների հետ:

Տասնմեկ գլուխներից եւ բազում
ենթագլուխներից բաղկացած հատորի ըն-
թերցանութիւնը երիցս դիւրացուած է մօտ
երեք տասնեակ քարտէզների եւ երկու
տասնեակ ծագումնաբանական ու տոհմա-
բանական աղիւսակների շնորհիւ:

Գիրքը հարուստ է պատկերազրական հէնքով, այն հասնում է այնպիսի շքեղութեան, որ հեղինակը նախաձեռնել է նկարազարդումը դարձնել գրքի հիմնական, գլխաւոր առանցքը՝ պատկերից դէպի պատմութիւն: Տեքստը ուղեկցում է նկարներին եւ հատորը վերածւում է պատկերազրքի (մօտ 940 պատկեր):

Հատորում կարելի է գտնել մեծ թուով մանրանկարներ, որմնանկարներ, կտաւներ որոնք ներկայացնում են զանազան պատմական իրադարձութիւններ, անձանց, որոնց մասին խօսում են հեղինակի կողմից տրուած յարակից բացատրութիւնները: Յուշարձանները, եկեղեցիները ներկայացուած են ինչպէս իրենց հնագոյն փորագրապատկերներով, այնպէս էլ հին լուսանկարներով:

Մանրամասն անդրադարձ կարելի է գտնել դրամների, կնիքների եւ նշանագիտութեան մասին: Մանրանկարչութիւնը գրքում ներկայացուած է կիլիկեան անկրկնելի նմոյշներով, որով հարուստ է Երուսաղէմի միաբանութեան մատենադարանը, յատկապէս Թորոս Ռոսլինի, Սարգիս Պիծակի եւ այլոց գործերի պատկերազարդումներով:

Գրքում իրենց արժանի տեղն են գրաւել նաեւ տարբեր ժամանակաշրջանների որմնանկարները, քարերի վրայ եղած արձանագրութիւնները, խաչքարերը, հախճապակեայ ձեռակերտ հրաշալիքները, ոսկեգործական ու արծաթագործական նմոյշներն ու վերջապէս մանրանկարչութիւնը:

Զանազան հեղինակների կողմից ամենատարբեր ժամանակաշրջաններում հայե-

րի մասին գրուած վկայութիւնները հեղինակը որոշել է ներկայացնել հնարաւորինս իրենց բնօրինակ էջերի վերարտադրումով (յուլարէն, լատիներէն, միջնադարեան ֆրանսերէն, գերմաներէն, հայերէն եւ այլն), անշուշտ տալով դրանց բացատրութիւնները եւ յղելով նշուած հատորների գտնուելու վայրը: Հայերէն յիշատակաւորները տրուած են իրենց բնօրինակի լուսանկարով, նոյնը օտար հեղինակների յղումներին է վերաբերւում, որոնք հնարաւոր է եղել գտնել Եւրոպայի եւ ԱՄՆ-ի տարբեր գրադարաններում: Ընրութիւնը կանգ է առել ձեռագրային յատկապէս գեղեցիկ նմուշների վրայ:

Հատորն օժտուած է մանրամասն ծանօթագրութիւններով, վերջում տրուած է առաւելապէս յղուող գրականութեան եւ յօդուածների այբենական ցանկը՝ համապատասխան յապաւումներով, ինչպէս նաեւ յատուկ անունների ցանկերով:

Անկարելի է չըջանցել մի հանգամանք, որ խիստ դժուարացնում է հատորի ընթերցումը: Գրքի ձեւաւորողների կողմից անյաջող ընտրուել տպագիր տառատեսակի չափը, դրա փոքրութիւնը յաճախ դժուարացնում է բովանդակութեան ընկալումը:

Ա. Մութաֆեանի «Երուսաղէմը եւ հայերը» աշխատութիւնը իր բերած ահռելի աղբիւրագիտական հէնքով նոր աստիճանի է բարձրացնում Ս. Երկրում հայոց պատմութեան ուսումնասիրութիւնը:

Էլիզաբեթ Թաջիրեան

